

豫

章

叢

書

第二冊

芑山文集卷十八

宜春 張自烈著

記一

王公書院記

崇禎十年夏四月宜邑袁臨侯視學三晉以書併袁士民狀來請記王公書院爲余言公初筮袁李官也富經術政成召入爲侍御旣去袁袁士民相率建祠祀公公聞而恥之檄袁士民曰生祠豈非今魏璫僇身赤族者哉毀諸袁士民曰生祠非古也祠懼失公意弗祠則闕念公先是以經術經世勤人讞獄率本

諸理學書院理學所自出榜曰王公書院可咸諸生
時爲公門下士知公稔不忍以公去忘尸祝請次其
事鐫諸石余考江國書院白鹿鷺湖特著他郡邑雖
設書院教道頗失實袁故書院列郡志者昌黎張巖
昌文外獨宗濂至今傳按沿革錄宋康定中周濂溪
攝蘆鎮立書院鎮西教授及門後人卽其地建祠又
於邑治南立濂溪書院學者稱之舍是無稱書院者
後數百餘年袁復稱王公書院云夫公之不樂袁有
祠豈惟恥與璫比名勝實非公志也理學其在斯與
往余居里門聞袁士民誦公無間言或告余曰公廉

介不苟取正身抗行惟孔孟是師嘗戒及門曰龍無
欲者莫制不則人醢之士焉可以欲自醢哉又嘗曰
士學寡要不適用雖蒐綴古汲冢羽陵攻文辭何益
或又曰公無細巨必謹始通籍來袁能其官孳孳詢
民疾苦訟牒旁午至罕留滯民以故不寃少間進諸
博士弟子員上下古昔誘之以忠孝厲之以風義酬
唱講評衍衍如也甚者爲諸生授麟經被服儒素數
抵張生塾不稍勸顧獨峭直少喜可嚴格勢人請謁
莫敢干以私迨其去卮匱匕箸凡袁有者悉委諸袁
橐無長物數卷圖書而已況公強仕方出爲時用一

日爲預擬歸隱圖思頤頤元亮康節間未幾以御史
予告歸杜門掃軌覃精論述四方贊其門者公做湖
學課之嚮服日以衆公後先束身莅官愛民造士類
如此余由是知公服膺理學非朝夕蓋所得於濂溪
者爲多而袁士民今日之以書院祠公視昔祀濂溪
相差埒盛哉雖公去袁弗獲宵斯隸斯袁士民食公
之德佩公之教登斯堂也若或見公相與講磨漸漬
重廉恥敦禮義烝烝未艾也公所貽於袁何如哉或
曰書院與時信誦幸不幸存焉當熹廟時攘排正學
以書院增祠徧天下賴今天子撥亂反正正學復大

明於世公書院得巋然存謂非幸哉余曰若公者徒以書院廢興重輕乎哉書院不能無廢興公所由有是書院在袁士民之心者雖百世不泯可也語未竟張子適謁余余具以臨侯言告張子張子曰今天下郊壘餘辱忠孝蕩然盡書院非獨祠公公教澤是繫推公學以教來世匪私也不可以無記遂記以歸之書院經始於某年月日落成於某年月日公名相說字懋弼號鞠劬直隸泰州人登天啟壬戌進士諸始終是役者例得書書於碑陰

此余代姜太史燕及先生筆先是王先生李吾袁

知吾兄弟與臨侯獨深未嘗干以私本記叙次王
先生雖未盡然一字不阿皆實錄也

又記

余冢宰崇祀紫陽書院記

婺故冢宰余公起家壬辰筮仕予鄉永新邑邑父老
博士弟子員請祀公澤宮今年公同郡士痛理學寢
失憮然曰昔朱紫陽宗孔孟創祠祀周程三先生勸
興求學功垂百世余公生紫陽之鄉明紫陽之學士
矜式無間言宜請於有司祀公紫陽書院理學其復
興乎有司俞所請如紫陽例蓋推本古從祀遺意云
四方賢士大夫益信公之足以傳也屬予記其事俾

承學取法焉予推古今儒臣從祀之議類失實不合
道識者非之他置不論顏淵配享始魏齊王唐貞觀
益以左邱明二十二人宋追崇子思孟軻然苟況揚
雄王安石父子雒然進久之退安石等進周程張朱
司馬光邵雍元始進淄川董仲舒若是者豈盡公論
與抑有幸不幸與明興黜邪說崇真儒濂洛關閩之
教明於世是時罷荀揚進王通楊時已又罷公伯寮
秦冉顏何戴勝劉向賈逵馬融何休諸人進歐陽修
胡瑗陸九淵於廟而祀遽瑗林放鄭元服虔范甯於
鄉薛文清王文成魏恭簡若而人或祀於鄉或祀於

學蓋斌斌盛焉迨濫祀踵繼羅念菴過吉州恥匪人
並列攜先人神主以歸唐應德卻其鄉公舉祠祀之
請至引三桓爲詆笑嗟乎近代祠祀無足榮類如此
獨公起諸大儒後宗法孔孟程朱而其偉德盛業大
節之見於時者尤頡頏文清文成間若公者謂非集
諸儒之成者歟夫孟軻子思可謂大賢矣然不能使
後世苟揚不雜進公生而服膺程朱歿而與程朱共
尸祝既不至如應德念菴所悼歎又公論久乃定公
之學旣明則孔孟之傳益著詎非公之幸也哉予考
公生平筮邑暨侍御視鹺按秦掌計總憲貳樞率以

忠敢聞最著者如定國本還詔書抗逆闕撤礦稅殄
毛紅平奢藺皆古大臣所難由公博學素見見理明
宜其膚功著而休澤遠也今上方表章周邵二程張
朱六子謂不當與漢唐諸人等稱先儒下禮臣議尊
崇之公所學如此雖易名崇謚躋公兩廡可以黜僞
學風來茲豈合祀紫陽諸賢足榮公乎哉予生也晚
不獲與公上下論議發明孔孟程朱之道猶幸登公
之堂從公子若孫讀公遺書想見公之爲人以予里
中父老所歌慕質諸予後先傳聞於公之子若孫與
夫公同里耆長賢士大夫之所誦述嗟乎公之不合

於道者鮮矣學者由公嘉言懿行以求合於孔孟程
朱庶無忝於私淑哉公名懋衡字持國號少原婺源
人崇禎壬午秋月旣望豫章後學某記

甘山藏書記

張子弱冠嗜書家世孔艱不獲觀先人遺籍鄉先達
豐顯皆不喜聚書間就他郡借鈔歸之一日語家仲
季書在四方宜出購里居鈔借非計辛未詣京師上
南離臚古今理學經濟書目置几右賈人持書目中
書來售倍其直橐中餽遺脯資自菽水僦賃外悉捐
購書不三年致書三十萬六千卷有奇近代名集稱

是甲戌載歸將建樓居之已念袁地僻士起家制科
獨博雅不少概見無他書亡士廢學耳袁郡學厯年
久宋淳熙五年知州事李杓李疑張鼎新之設脩古閣

藏書元至元中總管張熙祖復建尊經閣意誠盛書
闕不詳國朝洪武二年太祖詔天下郡縣建學袁以
盱江記特聞然是時郡學書未備也世廟中分宜嚴
相國嵩爲鈴麓書院祀先聖止善堂無藏書先是嵩
官太宗伯斂書送學考邑志所送四書五經性理通
鑑名臣奏議正蒙玉海二程遺書晦菴文集西山讀
書記文獻通考昭明文選唐文粹元文類劉向說苑

蘇文忠集及孝順事實爲善陰陽明倫大典義勇武
安王集而止二十一史雖載缺不完又其書獨私之
鈐邑無補郡學又皆散棄蠹蝕不可識因歎袁建學
以來未嘗不增舍置田所少獨書耳私欲出芑山藏
書置郡學尊經閣續建稽古閣講堂數十楹廢產置
附郭田數百畝籍學宮使世掌之佐郡人士家貧好
學養殯諸費郡人士由是稽古適用以博雅著稱惡
至如余鄉者鈔借之勞且困哉雖然余徒有其志耳
丁丑臨藍賊掠袁書藏蘆洲者遺什之三四戊寅居
金陵增續補輯如初癸未徙家南邨方擇別經史子

集副本出公郡學以竟始志會寇難左師以援勦至
屠城芑山藏書燬什之六七甲申春扶母避亂將之
閩撥山中遺書僅存者如干卷笈以自隨每憶居金
陵年致書三十萬六千卷有奇悲咽不自勝孟夏客
潯聞變撫卷流涕秋載書入信州葛川家焉乙酉偕
李暨及門刪定四書大全辨行世寇窺葛川將母竄
山谷中寇退則書又逸什之八九余盡然傷之或告
余曰遭亂救死不贍焉用書兩都中祕書安在張子
獨抱遺書不置何哉余曰治亂皆不可無書祕籍蕩
盡賴芑山書存耳世雖亂未有一日不衣食者書猶

衣食豈可一日廢哉今天下干戈未戢芑山書在葛川者異時不知存軼何如姑爲記貽後人庶幾袁守宰及鄉先達之賢者推廣余意補昔人稽古尊經之闕使古學賴書而復又使天下後世知書不可廢學不可輟則書雖亡猶存余復何憾哉因略叙藏書始末書存葛川者列其目如左仍顏芑山蓋不忘所自云丁亥仲秋旣望葛川旅人某記

書存亡繫幸不幸要未可以此廢書廢書必廢學廢學必叛道守待誰任哉雖然書具在尤當深求

讀書法耳 自記

葛川書歸芑山記

癸未冬遘亂自火其廬弗顧書僅存甲申正月朔四
出奔過豫章笈書扶老稚之閩潭陽及關道梗退六
月僑信州葛川書寓葛川旅舍乙酉偕季涉覽多論
著忘其在顛沛也丙戌連膺薦牘擁書太息不就丁
亥葛川罹寇難懼書淪亡次始末自爲記奉母還里
書不獲反留一蒼頭視之母歸八閱月見背晨暮銜
恤憶書輒出涕庚寅故人陳太宰名夏欲盡梓余論
著以傳屬趙侍御如瑾董成侍御行部江以西首咨
袁司理王延禔曰梓芑山論著孰先司李曰芑山論

著富前奉旨刪定四書大全進御明經翼傳莫先是
書侍御諾六月望日司李馳侍御書幣來山中告余
故余時逡巡久之尋念大全苟版行亦猶本朝之文
獻也書戒變姓出亡未晚始詣郡城見司李以書報
侍御不謁謝侍御檄十三郡襄事已又發符傳趣興
安令葉承祧命役徙葛川書凡碑大全者歸芑山會
徹差事寢十月葛川書盡反舟鱗漬壤過半余畢其
惛日間者以梓大全故汲汲橐書歸旣歸書漬壤如
此大全又中廢如此嗟乎書何辜厄至此極哉余年
五十四儼甚不能復出遊如戊寅居金陵輯補如初